

Na osnovu člana 12. i 18. Zakona o udruženjima i fondacijama («Službene novine Federacije BiH», broj 45/2002), osnivačka skupština Udruženja Savez klizačkih sportova Federacije Bosne i Hercegovine, na sjednici održanoj 29.07.2010. godine u sjedištu Udruženja u ul. Put Famosa 36, 71000 Sarajevo d o n o s i

## **STATUT**

### **Udruženja Savez klizačkih sportova Federacije Bosne i Hercegovine**

#### Član 1.

Ovim Statutom se regulišu sljedeća pitanja udruženja Savez klizačkih sportova Federacije Bosne i Hercegovine (u daljem tekstu SKSFBiH):

- 1) naziv i sjedište udruženja;
- 2) ciljeve i djelatnost udruženja;
- 3) zastupanje i predstavljanje udruženja;
- 4) organe udruženja, njihova ovlaštenja, način imenovanja i opoziva, trajanje mandata, kvorum i pravila glasanja, uključujući i pitanja o kojima se odlučuje kvalificiranom većinom, funkciju osobe ovlaštene da saziva skupštinu;
- 5) oblik i sadržaj pečata udruženja;
- 6) oblik i sadržaj znaka udruženja;
- 7) sticanje i raspolaganje imovinom;
- 8) način donošenja finansijskog izvještaja i izvještaja o radu;
- 9) postupak za donošenje statuta, izmjena i dopuna statuta i drugih općih akata udruženja;
- 10) uvjete i način ućlanjenja, prestanak članstva, kao i prava, dužnosti i odgovornost članova udruženja;
- 11) uvjete i postupak za pripajanje, razdvajanje, transformaciju ili prestanak rada udruženja;
- 12) pravila za raspodjelu preostale imovine u slučaju prestanka rada udruženja.

#### **Naziv i sjedište udruženja**

#### Član 2.

Naziv SKSFBiH je istovjetan na svim jezicima, koji su u službenoj upotrebi u Bosni i Hercegovini i službeno se koristi na latinici i ćirilici.

Naziv SKSFBiH je: Savez klizačkih sportova Federacije Bosne i Hercegovine.

Skraćeni naziv Saveza klizačkih sportova Federacije Bosne i Hercegovine je SKSFBiH.

Sjedište SKSFBiH je na adresi ulica Put Famosa broj 36, Sarajevo.

SKSFBiH djeluje na cijelom teritoriju Federacije Bosne i Hercegovine.

#### Član 3.

SKSFBiH je udruženje klizačkih klubova.

#### Član 4.

SKSFBiH je član Saveza klizačkih sportova BiH i drugih sportskih asocijacija.

#### Član 5.

SKSFBiH je vanstranačka i nepolitička organizacija.  
SKSFBiH svoj rad zasniva na načelu poštivanja međunarodnih prava i sloboda čovjeka i sportiste i ne dopušta rasnu, nacionalnu i vjersku diskriminaciju.

#### Član 6.

SKSFBiH je neprofitabilna organizacija i ima svojstvo pravnog lica.  
Za svoje obaveze SKSFBiH odgovara cjelokupnom svojom imovinom.  
Registracija SKSFBiH vrši se u skladu sa zakonom.

### **Ciljevi i djelatnost udruženja**

#### Član 7.

Ciljevi SKSFBiH su:

- Razvoj i unapređenje klizačkog sporta na području Federacije BiH;
- Međunarodna sportska saradnja uz saglasnost Saveza klizačkih sportova Bosne i Hercegovine;
- Saradnja sa odgovarajućim državnim (općina, kanton, entiteti i dr.), društvenim, naučnim i stručnim organizacijama i drugim organima i organizacijama na realizaciji zadataka od zajedničkog interesa;
- Zaštita društvenog ugleda SKSFBiH i zaštita udruženih članova SKSFBiH;

#### Član 8.

Djelatnosti SKSFBiH su:

- predstavljanje klizačkog sporta Federacije BiH u domaćim klizačkim savezima;
- održavanje kontakta sa domaćim klizačkim sportskim savezima;
- imenovanje svojih predstavnika u odgovarajuća tijela Saveza klizačkih sportova BiH ili drugih domaćih sportskih organizacija;
- rukovođenje zajedničkim takmičenjima na nivou Federacije BiH i nižem nivou;
- sudjelovanje na domaćim takmičenjima i međunarodnim takmičenjima uz saglasnost Saveza klizačkih sportova Bosne i Hercegovine;

### **Zastupanje i predstavljanje udruženja**

#### Član 9.

SKSFBiH pred organima i organizacijama, predstavlja predsjednik i potpredsjednik Upravnog odbora.

## **Organi udruženja**

### **Član 10.**

Organizacija, sastav i način rada organa i radnih tijela SKSFBiH uređuju se tako da se obezbijedi ravnopravno odlučivanje i odgovornost udruženih klizačkih klubova u organima tijela SKSFBiH, a na ostvarivanju prava i dužnosti utvrđenih ovim Statutom i drugim općim aktima SKSFBiH.

### **Član 11.**

Organi SKSFBiH:

1. Skupština,
2. Upravni odbor,
3. Generalni sekretar

## **Skupština**

### **Član 12.**

Skupština SKSFBiH (u daljem tekstu Skupština) je najviši organ SKSFBiH.

Udruženi klizački klubovi sudjeluju u upravljanju poslovima SKSFBiH putem svojih predstavnika u Skupštini.

Svaki udruženi klizački klub može imati najmanje po jednog predstavnika u Skupštini.

### **Član 13.**

Skupština SKSFBiH ima najmanje 10 članova.

Članovi Skupštine se biraju iz reda predstavnika udruženih klizačkih klubova, predstavnik sponzora, predstavnika drugih organizacija i sportskih radnika.

### **Član 14.**

Skupština odlučuje na sjednici kojom rukovodi predsjednik, odnosno potpredsjednik, čiji mandat traje 4 godine.

Sjednice Skupštine mogu biti redovne ili vanredne.

Redovne sjednice se održavaju jednom godišnje, po završetku kalendarske godine.

Vanredne sjednice se održavaju prema ukazanoj potrebi, s tim što se moraju održati ako to zahtjevaju članovi koji imaju najmanje jednu polovinu glasova u Skupštini ili Upravni odbor.

Vanrednu sjednicu može zahtjevati i 1/3 članova skupštine u slučaju inicijative za opoziv člana Upravnog odbora.

Predlagač je dužan pismeno navesti i obrazložiti razloge radi kojih traži sazivanje Skupštine.

Skupštinu je dužan sazvati predsjednik Skupštine u roku od 30 dana od dana dobijanja zahtjeva i na dnevni red Skupštine staviti pitanja koja zahtjeva predlagač.

U slučaju da je predsjednik ne sazove Skupštinu u navedenom roku, Skupštinu može sazvati bilo koji član Skupštine.

#### Član 15.

Sjednica Skupštine se saziva pismenim putem i to najkasnije 7 dana prije njenog održavanja, a materijal za sjednicu dostavlja članovima najmanje 7 dana prije njenog održavanja. Izuzetno kada su u pitanju vitalni interesi SKSFBiH, Upravni odbor može zakazati sjednicu Skupštine i u kraćem roku od roka iz prethodnog stava (ali ne u kraćem od 5 dana prije roka održavanja sjednice Skupštine).

#### Član 16.

Skupština donosi odluke i zaključke.

#### Član 17.

Odluke i zaključke Skupština donosi, ako je prisutna natpolovična većina članova od ukupno 10 članova Skupštine. Izuzetno u odnosu na prethodni stav za donošenje Statuta, njegove izmjene i dopune, o prestanku rada SKSFBiH, kao njegove izmjene u načinu organiziranja potrebno je dvotrećinska većina prisutnih članova u Skupštini.

#### Član 18.

Skupština može svojom odlukom obrazovati stalne i povremene komisije radi proučavanja i predlaganja pojedinih pitanja iz nadležnosti Skupštine. Za članove komisija iz prethodnog stava ovog člana mogu biti izabrani predstavnici osnivača u Skupštini i radnici u SKSFBiH, kao i lica izvan SKSFBiH koja svojim znanjem i iskustvom mogu doprinjeti uspješnom radu komisije u rješavanju pitanja zbog kojih se komisija obrazuje. Broj članova komisije, trajanje mandata, konkretni zadaci i način rada i odlučivanje, kao i naknade za rad, reguliše se odlukom Skupštine o njihovom obrazovanju. Komisije iz reda svojih članova biraju predsjednika i zamjenika. Mandat članova stalnih komisija traje 4 godine, a mandat članova povremenih komisija traje do završetka zadataka zbog kojih je komisija imenovana. Skupština može opozvati pojedine ili sve članove komisije prije isteka redovnog mandata, zbog neizvršavanja ili nepravilnog vršenja povjerenih zadataka.

#### Član 19.

Skupština u okviru zakonskih ovlaštenja i ovlaštenja Statuta:

1. Donosi:
  - Statut, izmjene i dopune i druge akte određene statutom,
  - daje saglasnost na pravne radnje poduzete u postupku osnivanja udruženja,
  - bira i opoziva članove Upravnog odbora, generalnog sekretara i lica ovlašteno za zastupanje i predstavljanje udruženja,
  - odluke o uključivanju i isključivanju udruženih klizačkih klubova u članstvo SKSFBiH,

- odluke o udruživanju u savez, pripajanju, transformaciji, prestanku rada i drugim statusnim promjenama udruženja,
  - odluke o svim pitanjima koja nisu u nadležnosti drugog organa.
2. Razmatra i usvaja:
- osnove poslovne politike i srednjoročni plan razvoja SKSFBiH,
  - godišnji obračun sa izvještajem o poslovanju,
  - izvještaje koje je pripremio Upravni odbor ili lice za predstavljanje i zastupanje,
  - izvještaj o radu i Finansijski izvještaj Upravnog odbora i odluke o ostalim pitanjima koja nisu u nadležnosti drugih organa SKSFBiH,
  - osnove kadrovsko-propagandne djelatnosti,
  - prigovore i žalbe članova SKSFBiH na odluke Upravnog odbora koje je ovaj organ rješavao u prvom stepenu.
3. Bira i razrješava:
- Predsjednika Skupštine,
  - Predsjednika, zamjenika i članove Upravnog odbora,
  - Generalnog sekretara
  - Stalne i povremene komisije Skupštine,
  - Odlučuje o svim drugim pitanjima koja su zakonom ili ovim Statutom stavljena u nadležnost Skupštine SKSFBiH.

#### **Upravni odbor**

Član 20.

Upravni odbor je izvršni organ Skupštine.

Član 21.

Upravni odbor SKSFBiH ima 5 članova.

Član 22.

Članove Upravnog odbora Skupština bira na period od 4 godine.

Ako se tokom mandata smanji broj članova Upravnog odbora, Skupština na novoj sjednici bira nove članove.

Članovi Upravnog odbora mogu više puta uzastopno biti birani u Upravni odbor. Izbor članova Upravnog odbora vršit će se u godini u kojoj im ističe mandat, na sjednici Skupštine na kojoj se usvaja godišnji obračun.

Član 23.

Upravni odbor ima predsjednika i zamjenika koga bira Skupština.

Član 24.

Upravni odbor ima sjednice koje se održavaju po potrebi.

Sjednice Upravnog odbora saziva predsjednik na svoju inicijativu ili na prijedlog potpredsjednika.

#### Član 25.

Upravni odbor u okviru zakonskih i statutarnih ovlaštenja:

1. Donosi:
  - odluku o sazivanju i pripremi sjednica Skupštine,
  - provodi politiku, zaključke i druge odluke koje je donijela Skupština,
  - upravlja imovinom SKSFBiH,
  - finansijski plan i ostale planove i programe rada SKSFBiH,
  - poslovne i opće akte SKSFBiH iz djelatnosti SKSFBiH osim akata koje donosi Skupština,
  - opća akta SKSFBiH kojima se utvrđuju prava, obaveze i odgovornosti radnika SKSFBiH po osnovu rada (radni odnos, zaštite na radu, odgovornosti, radne norme, zajednička potrošnja, stambeni odnosi, obrazovanje, usavršavanje i dr.) u skladu sa Zakonom, kolektivnim ugovorom i ovim Statutom,
  - odluku o limitu mogućeg zaduženja SKSFBiH sa bankama i drugim organizacijama,
  - odluku o visini ličnih dohodaka i iznosima naknade za rad članova Upravnog odbora,
  - Poslovnika o radu Upravnog odbora.
2. Razmatra utvrđuje i usvaja:
  - prijedlog nacрта izmjena Statuta i drugih akata koje donosi Skupština,
  - prijedlog dnevnog reda za Skupštinu,
  - periodične i godišnje obračune i izvještaj o poslovanju tokom godine,
  - izvještaj o popisu sredstava i izvora sredstava na kraju godine,
  - kriterije (limite) za nabavku i otuđenje osnovnih sredstava SKSFBiH,
  - odluke o visini i načinu plaćanja članarine,
  - osnove kadrovske politike.
3. Bira, imenuje i razrješava:
  - Radnike sa posebnim ovlaštenjima i odgovornostima SKSFBiH,
  - Šefa stručnog štaba, Selektora – trenera i dr,
  - Komisije u SKSFBiH.

Upravni odbor izvršava opća akta i odluke Skupštine i vrši sve druge poslove između sjednica Skupštine, a u okviru ovlaštenja datih aktom Skupštine.

Upravni odbor donosi odluke i obavlja i sve druge poslove u skladu sa zakonom, Statutom i općim aktima SKSFBiH, osim poslova koji su dati u nadležnost nekom od drugih organa SKSFBiH.

#### Član 26.

Svaki član Upravnog odbora ima pravo na jedan glas.

Glasanje na sjednici je javno.

Odluke i zaključci Upravnog odbora donose se natpolovičnom većinom glasova ukupnog broja članova Upravnog odbora.

## Član 27.

Predsjedniku i članovima Upravnog odbora može prestati mandat prije isteka redovnog roka:

- ostavkom na članstvo,
- prestankom rada osnivača od kojeg je delegiran,
- prestankom radnog odnosa u SKSFBiH i
- opozivom.

Inicijativu za opoziv člana Upravnog odbora može dati 1/3 članova Skupštine.

Odluku o prestanku mandata predsjedniku i članovima Upravnog odbora donosi Skupština.

## Član 28.

Upravni odbor za svoj rad odgovoran je Skupštini SKSFBiH i obavezan je da joj podnosi izvještaj o radu najmanje jednom godišnje. Članovi Upravnog odbora odgovaraju za štetu koja nastane uslijed njihovog nezakonitog rada, prekoračenja ovlaštenja, kao i u slučajevima ako su pri davanju prijedloga Skupštini prikrili ili svjesno upotrijebili neistinite činjenice i obavještenja. Odgovornosti iz prethodnog stava oslobođen je član Upravnog odbora koji je protestovao protiv odluke ili radnje Upravnog odbora i o tome odmah pismeno obavijestio Skupštinu SKSFBiH, kao i član koji nije učestvovao u radu Upravnog odbora na kojoj je nezakonitim radom ili odlukom nanijeta šteta SKSFBiH.

## Član 29.

Članovi Upravnog odbora imaju pravo na naknadu za rad.

## **Generalni sekretar**

## Član 30.

Stručne i administrativne poslove SKSFBiH obavlja Generalni sekretar SKSFBiH, kojeg bira i postavlja Skupština SKSFBiH u skladu sa propisima iz oblasti sporta i ovim statutom.

Generalni sekretar SKSFBiH može biti lice na profesionalnom radu u SKSFBiH, o čemu odlučuje Upravni odbor.

Mandat Generalnog sekretara SKSFBiH traje najviše četiri godine, s tim da Upravni odbor najmanje jedan put godišnje ocjenjuje rad tog sekretara, kojom prilikom može predložiti Skupštini da ga razriješi ukoliko ocijeni da je nezadovoljan njegovim radom.

Za generalnog sekretara može biti izabrano lice sa VŠS ili VSS, koje je afirmisani sportski radnik u klizačkom sportu, poznavalac organizacije SKSFBiH u svim segmentima rada, uz znanje bar jednog od zvaničnih jezika ISU. Upravni odbor može propisati i druge uslove potrebne za obavljanje ovog posla.

Generalni sekretar izvršava sve odluke organa SKSFBiH i zadužen je za rad SKSFBiH, za odnose sa organima i članovima SKSFBiH, klubovima i asocijacijama koje su učlanjene u SKSFBiH, kao i za odnose sa trećim licima i ISU, te je zadužen za koordinaciju rada radnih tijela i komisija Upravnog odbora SKSFBiH.

Generalni sekretar podnosi izvještaje po zahtjevu Upravnog odbora i to najmanje jedan put godišnje.

Generalni sekretar je odgovoran za zakonitost rada SKSFBiH i realizaciju programa, planova izvještaja i odluka organa SKSFBiH.

Za određene stručne, tehničke, materijalne i finansijske poslove Upravni odbor može angažovati i druga ovlaštena fizička i pravna lica.

### **Oblik i sadržaj pečata, znaka i zastave SKSFBiH**

#### Član 31.

SKSFBiH ima svoj pečat, znak i zastavu.

Pečat je okruglog oblika, obima 30 milimetara sa natpisom «Savez klizačkih sportova Federacije Bosne i Hercegovine Sarajevo». Natpis je na latinici, a u sredini se nalazi znak SKSFBiH.

Znak SKSFBiH je okruglog oblika, obrubljen sa po dvije stilizirane parnice zelene i crvene boje, koje se ukrštaju u donjem dijelu, a u gornjem dijelu između njih je pahuljica plave boje.

Zastava SKSFBiH je bijele boje, odnosa dimenzija 2 : 1, a u sredini se nalazi znak SKSFBiH koji zauzima najviše do trećine površinu zastave.

### **Sticanje i raspolaganje imovinom**

#### Član 32.

Materijalno-financijsko poslovanje SKSFBiH obavlja se u skladu sa Zakonom, Statutom i Pravilnikom o materijalno-financijskom poslovanju SKSFBiH.

Sva raspoloživa sredstva su sredstva SKSFBiH, a prikupljaju se, drže, koriste, deponuju, na osnovu zakona i odluka organa SKSFBiH donijetih u skladu sa zakonom i ovim Statutom.

Imovinu SKSFBiH čine:

1. članarine,
2. dobrovoljni prilozi i pokloni fizičkih i pravnih lica,
3. sredstva dodijeljenja iz budžeta,
4. prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda,
5. prihodi stečeni obavljanjem privredne djelatnosti,
6. drugih prihoda stečenih u skladu sa zakonom i Statutom.

#### Član 33.

Obim namjene i raspodjela finansijskih sredstava, utvrđuje se finansijskim planom prihoda i rashoda za svaku godinu, a na osnovu utvrđenog plana i programa rada, donosi Upravni odbor SKSFBiH.

#### Član 34.

Financijsko poslovanje sredstvima SKSFBiH obavlja se preko jedinstvenog žiro-računa SKSFBiH.



#### Član 35.

Za obaveze prema trećim licima SKSFBiH odgovara svim sredstvima u skladu sa zakonom (potpuna odgovornost).

#### Član 36.

Utvrđivanje prihoda i rashoda SKSFBiH i rezultata poslovanja vrši se jedinstvenim bilansom u skladu sa zakonom i općim aktima SKSFBiH.  
Ostvareni dobit na kraju poslovne godine, SKSFBiH raspodjeljuje odlukom Skupštine SKSFBiH u skladu sa zakonom i općim aktima SKSFBiH.

#### Član 37.

Pokriće gubitaka, postupak sanacije i likvidacije SKSFBiH sprovodi se po postupku i na način utvrđen zakonom.

#### **Način donošenja finansijskog izvještaja i izvještaja o radu**

#### Član 38.

SKSFBiH je dužan uredno voditi poslovne knjige i sastavljati finansijske izvještaje i izvještaje o radu, u skladu sa ovim Statutom, zakonom i drugim propisima.

#### **Postupak za donošenje statuta, izmjena i dopuna statuta i drugih općih akata udruženja**

#### Član 39.

Osnovni akt SKSFBiH je Statut.  
Opći akti SKSFBiH su pravilnici, odluke i drugi akti kojima se na opći način uređuju pitanja iz poslovanja i položaja radnika SKSFBiH.  
Pojedinačni akti su odluke, rješenja, zaključci, uputstva i mišljenja.

#### Član 40.

Statut i opće akte SKSFBiH donosi Skupština, u skladu sa zakonom i odredbama ovog Statuta donosi Upravni odbor SKSFBiH.  
Izmjene i dopune Statuta usvaja Skupština na osnovu nacrtu kojeg podnosi Upravni odbor.

#### Član 41.

Pojedinačne akte donosi Upravni odbor SKSFBiH u skladu sa Statutom.

#### Član 42.

Svi akti SKSFBiH moraju biti u saglasnosti sa zakonom i kolektivnim ugovorom, a opća i pojedinačna akta moraju biti u saglasnosti sa odredbama ovog Statuta.

U slučaju nesaglasnosti pojedinih odredaba i akata sa odredbama zakona ili Statuta, pristupit će se odmah njihovom usaglašavanju, a do usaglašavanja primjenjivat će se odredbe zakona odnosno Statuta.

#### Član 43.

Nadzor nad zakonitošću i primjenom akata vrše organi SKSFBiH.

### **Uvjeti i način učlanjenja, prestanak članstva, prava, dužnosti i odgovornost članova udruženja**

#### Član 44.

Udruženi klizački klubovi SKSFBiH mogu biti svi klizački klubovi sa područja Federacije BiH registrovani kod nadležnih organa Federacije BiH ili njenih kantona.

#### Član 45.

Klizački klub postaje član SKSFBiH kada njegovu molbu prihvati Skupština SKSFBiH. Uz molbu, klizački klubovi prilažu dokaz o upisu u registar kod nadležnog organa i primjerak svog statuta.

#### Član 46.

Udruženi klizački klubovi SKSFBiH svojim statutom i drugim općim aktima uređuju unutrašnje odnose, način organizovanja i takmičenja u skladu sa vlastitim potrebama.

#### Član 47.

Udruženi klizački klubovi SKSFBiH imaju jednaka prava da:

- preko svojih predstavnika aktivno učestvuju u radu odlučivanja u svim organima i tijelima SKSFBiH;
- njihovi predstavnici biraju i budu birani u organe i tijela SKSFBiH;
- aktivno učestvuju u utvrđivanju programa i plana rada SKSFBiH i učestvuju u njihovoj realizaciji;
- ostvaruju domaću saradnju u skladu sa programom domaće saradnje SKSFBiH uvažavajući i pravo na posebne odnose sa sportskim klizačkim organizacijama u okruženju, a u skladu sa propisima i uz saglasnost Saveza klizačkih sportova BiH.

#### Član 48.

Udruženi klizački klubovi SKSFBiH su obavezni da:

- poštuju Statut, Pravilnike i odluke SKSFBiH;

- poštuju akta, odredbe i odluke Saveza klizačkih sportova Bosne i Hercegovine, kao i da poštuju i primjenjuju pravila klizačkog sporta usvojena i objavljena od Međunarodne klizačke unije;
- međusobno saraduju radi ostvarivanja ciljeva i zadataka iz nadležnosti SKSFBiH;
- učestvuju u finansiranju SKSFBiH i čuvanju njegove imovine.

#### Član 49.

Članstvo udruženog klizačkog kluba u SKSFBiH prestaje:

- dobrovoljnim istupanjem;
- prestankom rada;
- isključivanjem zbog nepridržavanja odredaba ovog Statuta i općih akata SKSFBiH i Saveza klizačkih sportova Bosne i Hercegovine.

Odluku o prestanku članstva udruženog klizačkog kluba donosi Skupština.

#### **Uvjeti i postupak za pripajanje, razdvajanje, transformaciju ili prestanak rada udruženja**

#### Član 50.

Odluku o pripajanju, razdvajanju, transformaciji ili prestanku rada SKSFBiH, donosi Skupština SKSFBiH dvotrećinskom većinom glasova od ukupnog broja članova Skupštine.

#### Član 51.

SKSFBiH prestaje sa radom u slučaju:

- ako se utvrdi da je udruženje prestalo djelovati,
- ako nadležno ministarstvo donese odluku o prestanku rada udruženja u skladu sa zakonom.

#### Član 52.

Smatra se da je udruženje SKSFBiH prestalo djelovati:

1. ako je proteklo dvostruko više vremena od vremena utvrđenog Statutom udruge za održavanje skupštine, a skupština SKSFBiH nije održana;
2. ako se broj članova SKSFBiH smanji ispod broja određenog zakonom, za osnivanje udruženja, a skupština udruženja u roku od tri mjeseca od dana nastupanja ove okolnosti ne donese odluku o prijemu novih članova.

#### **Pravila za raspodjelu preostale imovine u slučaju prestanka rada udruženja**

#### Član 53.

Prestankom rada SKSFBiH sva imovina pripada osnivačima. O podjeli imovine odlučuje Skupština.

#### Član 54.

Ukoliko Skupština ne donese odluku o raspodjeli imovine do dana brisanja iz registra, Federalno ministarstvo će donijeti odluku o raspodjeli preostale imovine drugoj fondaciji ili udruženju registriranoj u Federaciji, koja obavlja istu ili sličnu statutarnu djelatnost u skladu sa zakonom.

### **Prijelazne i završne odredbe**

#### **Član 55.**

Donošenje općih akata i pojedinačnih akata SKSFBiH, predviđeno je ovim Statutom u roku od 6 mjeseci od dana usvajanja Statuta.

Privremeno usklađivanje odnosno donošenje akata iz prethodnog stava izvršit će Upravni odbor.

#### **Član 56.**

Tumačenje odredaba ovog Statuta vrši Skupština SKSFBiH.

#### **Član 57.**

Ovaj Statut stupa na snagu danom donošenja.

#### **Član 58.**

Ovaj Statut usvojen je na sjednici Skupštine SKSFBiH održanoj 29.07.2010.godine u sjedištu Udruženja u ul. Put Famosa 36, 71000 Sarajevo.

**PREDSJEDNIK SKUPŠTINE**

Dževad Tirak